

INUIT ATAQATIGIIT INATSISARTUNI



UPA2024/80

25.04.24

Edvard Nielsen Aronsen

Inatsisartunut qinersinermi inatsit tunngaviatigut, inatsisartullu agguataarneranut kisitseriaaseq, inatsisartut amerlassussaat kiisalu qanoq nunatsinni siammasissumik inatsisartuni ilaasortaaitaqarneq, qanga kommuunit kattutinngikkallarmata kredsimi qinikkat 17-it ilaasortanngorsinnaanngortillugit aamma illoqarfiit inuttussusii najoqqutaralugit ilaasortaqaalerlutik apeqquteqaat aallaavigalugu oqallisissiamik siunnersuut.

Saqqummiussisoq. (Inatsisartuni ilaasortaq Jens NapätôK', Naleraq)

Oqaaseqaat:

Inuit ataqatigiinniit isumaqarpugut ullumikkut partiimut taasinerit aallaavigalugit inatsisartuni ilaasortanik amerlassusiliisarnerit tamat oqartussaaqataanerannut innarliisimangitsut, aammalu nunatta aggulunnagu tamakkerlugulu qinersivittut ataasiinnanngortinneqarsimanera tamat oqartussaaqataanerat eqqarsaatigissagaanni siammasissumik aaqqiinerusoq.

Inuup nammineq pisinnaatitaaffigisariaqarpaa aaliangissalluni kina qinissanerlugu, tamallu oqartussaaqataanerat eqqarsaatigissagaanni nunatsinni qinersiviup ataasiinnanngortinneqarsimanera tamatumunnga tulluurtuuvoq. Qinersisartoq isumaqaruni kina sinniisorissallugu isummertaatsiminut tulluarnerunerunersoq killilersorneqarani tamanna toqqarsinnaasariaqarpaa, tassalu tamat oqartussaaqataanerata isumaa.

Isumaqarpunga qanga qinersisaaseq utertinneqarluni kredsikkaartumik qinersisoqartalissappat isorliunerusormiunut tamanna kingunerlussinnaasoq. Maannami qinerseriaatsip tamatta naligiimmik tassa illoqarfissuarniikkaluarutta imaluunniit nunaqarfinniikkaluarutta assigiimmik periarfissaqartippaatigut, tasanilu sumiikkaluaruttaluunniit oqartussaaqataanerput ersarinnerulersinneqarpoq. Inuit

INUIT ATAQATIGIIT INATSIARTUNI



ataqatigiimmi kissaatigaarput tamat oqartussaaqataanerat nukittoq kiisalu innuttaasunik peqataatitsisoq, tamannalu qinersiviup ataasingangortinneqarnerani anginerusumik periarfissaalersutut uanga isumaqarfigaara kikkut nuna tamakkerlugu sinniisoriumallugit aaliangertarnermi. Nunarpummi tamaat isigalugu isumaqarutta kikkut sinniisutut piukkunnarnersut killeqarfinnik aporfilersorneqarata toqqarsinnaasariaqarpagut.

Soorunami nalilersorneqartuartariaqartussaavoq tamat oqartussaaqataanerat, puigussanngilarpulli sumiiffinnik killersuutit tamanna annikillisassanngimmassuk. Tamanna isumaqanngilaq sumiiffiit ataasiakkaat minnerusumik pisinnaatitaaffeqalernerannik aammalu oqartussaaqataanerisa millisarneqarnerannik. Inuit ataqatigiinni pingaartipparput innuttaasut peqataatinneqartuarnissaasa nukittorsarneqartuarnissaat, nunatsinnili qinersiviup ataasiinnanngortinneqarnerani periarfissaq taanna innuttaasunut tunniunneqarsimasoraara naak tamanna allatut nipilerniarneqartaraluartoq.

Uanga nammineerlunga isumaqarpunga nunat allat periusaat suulluunniit nunatsinnut naleqqussarlugit aqqissuussisarnerit pitsaasortaqaarsinnaangaluit nunarput nunattalu atugassarititai aallavigalugit inatsisartuni suligutta inuiaqatigiinnut pitsaanerpaajusussaasoq. Inuit ataqatigiinnimi pingaartipparput inuiattut nunatullu namminiussuseqarnitta aallaaviunissaa. Taamaattumik nunarput aallaavigalugu qinersisarneq pillugu inatsisiliorsimanermi isumaqarpunga maanna inatsisartuni ilaasortat amerlasusaat eqqarsaatigalugu allanngortitsinissamut pissutissaqanngikkallartugut.

Suulluunniit nalilersuinerit pillugit soorunami Inuit ataqatigiinniik oqaloqataassaagut aammalu isummerfigisassani aamma isummersortarumaarluta. Kisiannili isumaqarpunga naalagaaffinngornissaq pillugu suliaqarnermi taassuma isummerfiginissaa pissusissamisoornerussasoq. Tassami tunngaviusumik inatsimmi pinngitsoorani naalakkersuinikkut sulinermi suleriutsit nunallu aqunneqarnerani inatsisartoqarnikkut aqqissuussisimaneq aamma naalagaaffinngornermut tulluarsartariaqassasut isumaqarama. Taannaasussaassaarlu piffissaq eqqortoq allannguisoqassappat nalilersuillunilu inatsisartoqarnikkut aqqissuusseqqinnissamut.